

M013B: Annolied (V: Bonaventura Vulcanius)

2,1 in der werelte aneginne
2,2 dô licht wart unde stimme
2,3 dô diu vrône gotes hant
2,4 diu spæhen werc geschuof sô manicvalt
2,5 dô teilte got sîne werc al in zwei
2,6 dise werlt ist daz eine teil
2,7 daz ander ist geistîn
2,7a dannen liset man daz zwâ werelte sîn
2,7b diu eine dâ wir inne biren
2,7c diu ander ist geistîn
2,8 dô gemengete der wîse gotes list
2,9 von den zwein ein werc daz der mennische ist
2,10 der beide ist – unde geist
2,11 dannen ist her nâh dem engele allermeist
2,12 alle geschafft ist in dem mennischen
2,13 sô iz saget daz êvangelium
2,14 wir sulen in ze der dritten werelte zelen
2,15 sô wir daz diu Kriechen hoeren reden
2,16 ze den selben êren wart geschaffen Adâm
2,17 habete er sich behalten

3,1 dô sich Luzifer dô ze übele gevienc
3,2 und Adâm diu gotes wort übergienc
3,3 dô balc sich es got desten mîr
3,4 daz her andere sîne werc sach rechte gên
3,5 den mânen und den sunnen
3,6 die geben ire licht mit wûnnen
3,7 die sterren behaltent ire vart
3,8 si geberent vrost unde hitze sô starc
3,9 daz viur habet ûfwert sînen zuc
3,10 doner unde wint iren vluc
3,11 die wolken tragent den regenguz
3,12 nider wendent wazzer iren vluc
3,13 mit bluomen zierent sich diu lant
3,14 mit loube decket sich der walt
3,15 daz wilt habet den sînen ganc
3,16 schoene ist der vogelsanc
3,17 ein iewelich dinc di ê noch habet

- 3,18 di ime got von êreste vergap
3,19 ne wære die zwei geschepte
3,20 die her geschuof die bezziste
3,21 die verkêrten sich in diu tobeheit
3,22 dannen huoben sich diu leit
- 4,1 kunt ist wie der vîent verspuon den man
4,2 ze schalke wolte er in haben
4,3 sô vuorte er ze der helle
4,4 die vûnv werlte alle
4,5 unze got gesante sînen sun
4,6 der erlôste uns von den sünden
4,7 ze offere wart her vûre uns brâht
4,8 deme tôde nam her sîne maht
4,9 ze hellen vuor her âne sünden
4,10 her herete si mit gewelte
4,11 der tiuvel verlôs den sînen gewalt
4,12 wî wurden al in vrîe gezalt
4,13 in der toufe wurden wir Christi man
4,14 den hêrren sulen wir minnen
- 5,1 ûf huop Krist sînes kriuzes vanen
5,2 die zweliv boten hiez her in diu lant varen
5,3 vone himele gap her in die kraft
5,4 daz si überwunden diu heidschaft